



Protocol

dalla seduta dil cussegl da vischnaunca,
gievgia, ils 14 da november 2019: allas 20¹⁵ – 23⁴⁵
Liug: Center sursilvan d'agricultura a Salaplauna

Presidi: Armin Berther

Actuara dil di: Ursina Murer-Fatzer

Presents:

- | | | |
|------------------------------|--|--|
| a) Cussegl | Christoph Berger
Stefan Columberg
Edgar Durschei
Anna Maria Genelin
Christian Loretz
Helga Probst-Linder
Martino Sabbadini | Armin Manetsch
Adrian Deflorin
Mario Flepp
Rita Huonder-Tenner
Giusep Lozza
Livio Zanetti |
| b) Suprastonza | Robert Cajacob
Victor Flepp | Clemens Berther
Wendelin Jacomet |
| c) Perstgisas
Suprastonza | Jris Lombris | |
| d) Perstgisas
cussegl | Admir Jasarevic | |
| e) Cumissiun
da gestiun | Beat Hosang
Manfred Caviezel | Toni Huonder |
| f) Canzlist | Andri Hendry | |
| g) Hosps | 2 | |

Plaid d'avertura entras il president

Premi Desertina

Ils 8 da november 2019 ha la surdada dil Premi Desertina puspei giu liug. Quei premi vegn surdaus mintga dus onns. Uonn han pader Urban Affentranger e las musicas da tscheiver Las Bagordas e Las Fifferlottas astgau prender encunter il Premi Desertina. Pader *Urban Affentranger* ha retschiert il premi da renconuschientscha per siu grond engaschi en favur dil Forum claustral e per sias stentas da promover in spért aviert da discussiun. Las duas musicas da tscheiver Las Bagordas e Las Fifferlottas han astgau retscheiver il premi da promoziun per il manteniment digl usit da tscheiver e per cheutras tgirar ina viva communitad. Sco orators ha la cumissiun saviu engaschar dr. oec. Dumeni Columberg (pader Urban Affentranger) e Kurt Jeitziner (musicas da tscheiver). Ils premis ein vegni surdai als honorai dil president communal *Robert Cajacob*.

Reavertura dalla baselgia sogn Martin en claustra

Il di da sogn Martin ei staus in di da fiasta a Disentis/Mustér. Oravontut pils paders benedictins. Denton era in di da fiasta per l'entira populaziun, ils hospis da lunsch e damaneivel ch'ei stai spannegiai sin la nova cumparsa dalla baselgia sogn Martin. Suenten quater onns da restauraziun e cuosts da rodund 16 milliuns francs splendura e tarlischa la baselgia sco aunc mai en sia historia da 1400 onns claustra Disentis/Mustér.

Fiera da sogn Martin

La fiera da sogn Martin ha era uonn carmalau ina gronda raspada da visitaders e marcadonts en nies vitg. La fin digl onn agricol croda sigl atun e sin il di da sogn Martin, ils 11 da november. Pli baul vegnevan ils animals da nez vendi quei di per cheutras puder pagar ils tscheins e per saver cuvierer ils cuosts d'alp. Ulteriuramein vegneva ei cumprau il necessari per ils meins d'unviern. Oz ei quei empau auter. Il temps ei semidaus denton igl usit viva e la populaziun pren onn per onn la caschun da s'entupar e da dar ina paterlada in cun l'auter.

Surselva

In per tuts e tuts per in – mo ensemen essan nus fermes. Sche nus patertgein egoistic e mirein mo per sesez, sche vegn ei tgunsch buc bien. Jeu tschontschel e patratgel cheu vid nossa regiun la Surselva. Il far e demanar en Surselva fa a mi panzieris. In exempel ei in quitau che nus havein oz sin tractanda. Tgei futur ha nies gimnasi claustral? Tgei futur ha il survetsch ambulanz sisum la Cadi? Tgei futur havein nus e co dumignein nus las sfidas che spetgan nus? Quei ch'ei clar a mi ei che nus stuein radicalmein e spert patertgar entuorn en nies agir. "Nus" ei manegiau cheu mintga vischnaunca e mintga habitont dalla Surselva. Nus stuein arver nies horizont, analizar nossas fermeziyas, setener ensemen e mirar d'investar nos daners efficient e communabel. Sche quei schabegia buc, sche perdin nus ina massa q.v.d daners e temps custeivel e tut grazia a nies agir egoistic. Bugen vegn plantau ils sems e zerclau en l'atgna era enstagl da guder e nezegiar igl entir curtin. Il potenzial da nossa vallada ei enorms, denton in proverbial di: "dus sescognan ed il tierz gudogna". En nies cass dad oz ei il tierz la capitala da Cuera. Pertgei sch'il gimnasi claustral havess da bandunar Disentis/Mustér ei la situaziun clara che nos affons frequentan egl avegnir il gimnasi a Cuera. Tgei che quei munta per famiglias e plazzas ei clar a mintgin da nus. Tut ils rodund 21'000 habitonts dalla Surselva han da saver star davos in gimnasi regiunal e quei buca mo cun daners, mobein era cun viver la regiunalitad e da dar cheutras a lur affons la pusseivladad da saver guder ina scolaziun datier dil dacasa. Jeu sperel ferm che quels plaids anflien la via tier nossas vischnauncas vischinas e portien fretg, pli bugen oz che damaun!

Communicaziuns:

Mortoris:

Giacomo Jakob Teigesser, naschius ils 15-04-1929, morts ils 20-09-2019

Amalia Cathomen-Manetsch, naschida ils 05-11-1936, morta ils 11-10-2019

Naschientschas:

Fionn Müller, naschius ils 19-09-2019, feagl da concusseglia Armin Manetsch e Priska Müller

Gustavo Travassos Cavaleiro, naschius ils 10-10-2019, feagl da Daniel Filipe Travassos Cavaleiro e Sara Virgilia Gonçalves Macedo

Orientaziun

Muort absenza digl actuar Paul Duff ei Ursina Murer sedeclarada promta da surprender quell'incarica per questa sera. Ils presents van d'accord cun la proposta.

Tractandas:

1. Protocol 22-2017/2020
2. Cunvegna da prestaziun gimnasi claustral Disentis/Mustér 2020-2022
(messadi nr. 38-2017/2020)
3. Preventiv 2020 (messadi nr. 39-2017/2020)

Cussegl da vischnaunca Disentis/Mustér
Il president: L'actuara dil di:

Armin Berther

Ursina Murer-Fatzer



Cussegl da vischnaunca 2017/2020
Protocol nr. 23
Seduta dils 14 da november 2019

1. Protocol

Protocol nr. 22-2017/2020

Il protocol ei vegnius tarmess tier per posiziun. Enteifer ils tschun dis fixai ei vegniu inoltrau neginas objecziuns.

*Il protocol vegn **approbaus senza midadas.***

Cussegl da vischnaunca Disentis/Mustér
Il president: L'actuara dil di:

Armin Berther

Ursina Murer-Fatzer



2. Cunvegna da prestaziun gimnasi claustra Disentis/Mustér (messadi nr. 38-2017/2020)

Presentaziun:

Suprastonza:

President communal: Robert Cajacob

Avon tschun onns ei la cunvegna da prestaziun en favur dil gimnasi claustral stada avon il cussegl da vischnaunca. La prestaziun presenta scada cun la fin digl onn 2019. Il gimnasi claustral ei d'immensa impurtonza per la regiun, per Disentis/Mustér denton era sur nos cunfins regionals ora. La problematica enconuschenta davart la digren da scolars ei vegnida discussiunada denter ils representants dallas vischnauncas, dalla Regiun Surselva, ord la politica ensemen cun ils representants dil gimnasi claustral, denter auter cun avat Vigeli Monn ed il rector Tom Etter (*11 scolars han entschiet igl onn 2019 il gimnasi*). La situaziun ei precara. Ins ei denton da buna speronza ch'ins vegn da recrutar scolars p.ex. dil Tessin, dalla Tiaratudestg, dall'Italia ed auters loghens.

Ils representants dalla claustra resp. dil gimnasi claustral han inoltrau danovamein per mauns dalla Regiun Surselva la damonda da prolungir la cunvegna da prestaziun. En la davosa seduta dalla conferenza dils presidents communnals han ins decidiu da sustener resp. da prolungir la cunvegna presenta, denton mo per in cuoz da treis onns e buca pli da tschun onns. La decisiun definitiva sa la conferenza dils presidents regionals buca prender. Mintga vischnaunca ha da prender posiziun e decider davart sia cumpart definida. Previu eis ei da sustener vinavon cun la summa totala da frs. 280'000.--/onn. La repartiziun suonda tenor clav. Per Disentis/Mustér munta quei ina cumpart da frs. 61'951.80/onn (total frs. 185'855.40, rundau frs. 186'000.--). En cass ch'ina vischnaunca separticipescha buc alla cunvegna presenta, vegn lezza cumpart buca repartida sin las ulteriuras vischnauncas q.v.d quei manco mass a disfavour dil gimnasi.

Discussiun:

Cussegl:

La Regiun Surselva, las vischnauncas vischinas e las scolas popularas, la populaziun tuts portan ina responsabladad per il manteniment ed il beinprosperar dil gimnasi claustral e las plazzas pertuccadas. Igl ei era impurtont da nezegiar las resursas ch'ei avon maun en nossa vallada p.ex. l'instrucziun da talian - gimnasi en collaboraziun cun la scola superiura.

Han ils representants dallas vischnauncas mintgamai retschert in rapport digl onn ord quella cunvegna da prestaziun?

President communal Robert Cajacob:

Rapports annuals ha ei enfin ussa buca dau. La cunvegna da prestaziun presenta include las incaricas adossadas alla claustra resp. preveda ina gruppa da lavur ord representants dalla Regiun Surselva (politichers, meinascolas, geniturs eav.) e dil gimnasi claustral. La gruppa da lavur ha da definir claras finamiras ed incaricas sco p.ex. structura, strategia futura etc.

Decisiun:

La suprastonza communal propona al cussegl da vischnaunca da:

- 1. d'approbar la cunvegna da prestaziun cun la Regiun Surselva davart il sustegn finanziel al gimnasi claustral Disentis/Mustér pils onns 2020-2022;**
- 2. Da conceder persunter il credit necessari da frs. 186'000.--, il qual vegn sbursaus en treis pagaments ulivs durant ils onns 2020-2022.**

Il cussegl approbescha las propostas dalla suprastonza unanimamein senza abstenziuns.

Cussegl da vischnaunca Disentis/Mustér
Il president: L'actuara dil di:

Armin Berther

Ursina Murer-Fatzer



3. Preventiv 2020 (messadi nr. 39-2017/2020)

La fatschenta vegn tgamunada dil vicepresident dil cussegl Mario Flepp.

Presentaziun:

Suprastonza:

President communal Robert Cajacob:

Las informaziuns impurtontas stattan el messadi. La vischnaunca ha bunas entradas denton la gronda part flessegia gia en expensas decididas. Cheutras resta ina pintga summa per novas investiziuns. Il cash-flow d'ina vischnaunca sco Disentis/Mustér duess semover denter 1,5 e 2,0 milliuns francs. Pigl onn 2020 vegn presentau el budget in cash-flow dad 1,33 milliuns francs. La suprastonza ei dil meini da saver presentar in bien preventiv. La vischnaunca gauda il mument pliras investiziuns che vegnan realisadas da privats p.ex sil sector dil turissem. Quellas investiziuns portan segiramein el futur entginas entradas alla vischnaunca. En vischnaunca eis ei impurtont da saver mantener l'infrastructura ch'ei avon maun sco era da saver realisar novas investiziuns sin quei sector. L'infrastructura communal cloma cheutras adina puspei suenter daners per sanaziuns (*CSC, serenera, vias d'uaul*), per l'elaboraziun d'in concept da parcar, per optimar la dismessa da rumien (*molocs en mintga vischinadi*) etc.

La discussiun davart ina sminuaziun dil pei da taglia da 120% vegn adina puspei lantschada. Denton pil mument sa la suprastonza communal buca proponer ina reducziun dil pei da taglia. En la situaziun dad oz ei quei buc realistic. Il pass per ina reducziun da taglia sa pér vegnir instradaus cura che las investiziuns dils privats sco era las communalas portan fretg.

Canzlist Andri Hendry:

La basa da preparar il preventiv 2020 fuorma il plan da finanzas 2020-2024, il program d'actividad e d'investiziun, il preventiv 2019 sco era ils quens 2018 e 2019. Cun agid d'ina presentaziun da "PowerPoint" fa il canzlist attents sin las midadas essenzialas denter il preventiv 2019 ed il preventiv 2020. El renda plinavon attent sin duas correcturas dalla numeraziun da conto el messadi tier la sparta pumpiers: *cto. 1500.4200.00 e buca cto. 1500.4260.00, cto. 1500.3612.01 enstagl da 1600.3612.01*. Tier la controlla da credits ein las summas "access Fontanivas" sco era "canalisaziun e serenera Pardomat" buca cuntenidas el total.

Cumissiu da gestiun:

President Beat Hosang:

"Conform ad artechel 54 dalla constituziun communal e dil regulativ per la cumissiu da gestiun havein nus controllau il preventiv 2020. La cumissiu ha repassau il preventiv ed ha tschentau las damondas alla suprastonza communal a caschun d'ina seduta comunabla. Per mauns dil cussegl havein nus rapportau a scret. Nus essan pertscharts che tut ils presents han studegiau las cefras en detagl ed aschia lein nus buc entrar memia profund en la materia, denton lein nus tuttina remarcar ina ni l'autra causa:

En general

Il cash-flow sepresenta cun rodund 1,3 milliuns francs en rama dils davos onns – el ei denton plitost bass per ina vischnaunca dalla grondezia da Disentis/Mustér. Quei era ord vesta dallas numerusas investiziuns vegnentas sco p.ex. la sanaziun dil center da sport ni l'engrondaziun e sanaziun dalla serenera. Ina gronda part dallas expensas ein ligiadas vid leschas e legislaziuns, contracts e convegnoientschas. Auters cuosts ein movibels e lain reducir. En quels puncts drova ei in bien agid dils gremis politics.

Nus lein far attents ch'in cash-flow en la dimensiun preventiva tonscha a liunga vesta buc per far las investiziuns senza augmentar ils deivets sin in'altezia che surpasa la limita da 5'000.-- francs deivet per habitont. En quei mument vegn igl uffeci da vischnauncas a suttametter nossa vischnaunca ad ina cussegliaziun pli intensiva en il rom dil preventiv.

Finanziaziuns specialas

Tier las finanziaziuns specialas lein nus remarcar che la dismessa e purificaziun d'aua vegn buca finanziada completamein ord las taxas, aschia ch'il deficit vegn cuvretgs ord il quen ordinari.

Center da sport e cultura

Il preventiv dil center da sport preveda ina sperdita da 244'700.-- francs. Quei ei en rama dils onns vargai. Il center da sport sauda tier il survetsch public e cheutras astga quella biala purschida era custar enzatgei alla vischnaunca. Ils cuosts duein vegnir optimai per survegnir ina buna relaziun denter purschida e cuosts.

Quen d'investiziun

Il quen d'investiziun 2020 preveda investiziuns nettas en l'altezia da rodund 3,2 milliuns francs. Ina part dallas investiziuns ein gia decididas, autras basegnan aunc decisiuns legalas. Gia sco menziunau a caschun dil plan da finanzas lein nus aunc ingada far attents che las investiziuns ston vegnir periodisadas ed etappadas optimalmein ed eventualmein era redimensiunadas per mantener in saun equilibr denter las investiziuns ed ils deivets.

En num dalla cumissiu da gestiun engraziel jeu per la buna collaboraziun cun ils differents gremis duront igl entir onn ora. Per damondas stein nus bugen a Vossa disposiziun. *Beat Hosang, president dalla cumissiu da gestiun*".

Discussiun:

Cussegl:

En cumparegliaziun cun il preventiv 2019 ein ils cuosts da personal s'augmentai per rodund 2.6%. Ei vegn menziunau ch'il motiv per quella differenza seigien ils alzaments usitai denton exclusivamein la carischia. Ina vischnaunca sco Disentis/Mustér ha era ina certa fluctuaziun da personal, cheutras sa in remplazzament succeder cun ina persuna pli giuvna e pli favoreivla. Ei quei fatg vegnius risguardaus? In alzament general ei buc giustifiaus.

President communal Robert Cajacob:

Las pagas dil personal vegnan adattadas tenor il regulativ per il personal communal. Els proxims onns semida la situaziun cunzun tiel personal dil menaschi tecnic e cheutras vegnan era las pagas a semidar resp. adattadas alla vegliadetgna.

Cussegl:

Tenor preventiv 2020 muossa il conto 0220.4210.00 entradas lubientschas da 40'000.-- francs enviars igl onn 2019 da 70'000.-- francs. Ha la differenza da far cun il baghetg Acla da Fontauna? Cu vegn la lubientscha tarmessa per quei project?

Conto 0220.4910.000; Il preventiv 2020 muossa in recav da 90'200.-- francs. Tgei lavurs supplementaras per auters departaments presta igl uffeci da baghegiar?

Gerau Wendelin Jacomet:

Egl uffeci da baghegiar ein buca duas persunas incaricadas, mobein ina per igl uffeci numnau e l'autra per igl uffeci d'infrastructura. Las lavurs dils responsabels dil departament da baghegiar ed infrastructura ein per part vegnidadas pli complexas e pretensiusas (dapli sclariments e cussegliaziuns giuridicas, polizia da fiug, concept da parcadis, planisaziun locala, protecziun civila etc.).

Canzlist Andri Hendry:

Il menader digl uffeci da baghegiar ha sper siu pensum usitau surpriu denter auter era l'incarica da SIBE (*Sicherheitsbeauftragter*). Quei temps da lavur vegn engrevegias a mintga singula sparta ch'el presta lavur. Ils contos 3910/4910 ein contos da scuntraziun interna q.v.d quels contos han la finala dad ir si ed han buca influenza sil resultat final dil quen. La differenza d'entradas tier las lubientschas da baghegiar da 70'000.-- francs enviers 40'000.--, ei ch'ins ha risguardau 2019 la taxa pil project Acla da Fontauna. La lubientscha ei en preparaziun e vegn prevedentamein tarmessa el decuors dil december 2019.

Cussegl:

Conto 0210.3113.00 (cumpra) e 0210.3153.00 (manteniment); Las expensas per EED e manteniment per EED ein pulit aultas, ord tgei raschuns?

Canzlist Andri Hendry:

Igl onn current ei il server vegnius remplazzaus. Talas investiziuns semovan denter 20'000.-- - 30'000.-- francs (preventiv 2019 38'000.--/preventiv 2020 12'500.--). Pil proxim onn eis ei previu da transferir la controlla da habitonts sil sistem niev G6 da Dialog. Plinavon han ins installau da niev il program d'administrar ils documents "GEVER". La finamira ei che l'administraziun vegn tec a tec digitalisada. Il manteniment da tut ils systems resp. programs cuosta gia frs. 25'000.-- (Dialog). Igl ei previu da remplazzar mintg'onn 1-2 computers per restar actuals.

Cussegl:

Conto 1400.4602.00; Co vegn il cudisch funsil Cadi menaus el futur, suenter la pensiun da Marcel Soliva?

President communal Robert Cajacob:

Sco successur da Marcel Soliva ei Martin Monn vegnius eligius. Marcel Soliva vegn suenter la pensiun a restar sco substitut da Martin Monn en in pensum da 20% (naven 2020). Eveline Soliva resta tiel cudisch funsil per dus/treis onns en in pensum da 50%. Ina piazza da 100% ei vegnida strieda, cun quei che la vischnaunca da Breil ei curdada naven.

Cussegl:

Conto 1500.4200.00; Las taxas da cumpensaziun ein vegnidadas augmentadas. Tuttina resta aunc ina pulita cumpart da cuosts per la vischnaunca. Con lunsch ei la cumissiun cun il concept en connex cun la repartiziun dils cuosts sin las vischnauncas vischinas?

Gerai Victor Flepp:

La taxa da cumpensaziun ha la suprastonza communal alzu da 300.-- sin 400.-- francs. La cumissiun da pumpiers ha medemamein alzu la schulda da 40.-- sin 50.-- francs e cheutras resultan dapli expensas. Cun quella midada ein uss tuttas vischnauncas sil medem stan (Sumvitg, Trun etc.). La revisiun dils statuts dils pumpiers ei aunc en elaboraziun. Fin november s'inscuntra la cumissiun cun Hansueli Roth per sclarir ils detagls (clav da repartiziun).

Cussegl:

Conto 1110.3132.00; Con lunsch ei il concept da parcar? Dat ei sliagiuz per la situaziun da parcadis el contuorn dil CSC?

President communal Robert Cajacob:

Il concept da parcar sigl entir intschess communal ei instradaus ed ei previus da presentar al cussegl igl onn 2020. Denton per quella sesiun vegn la problematica parcadis a restar. Vinavon vegn la suprastonza communal a presentar al cussegl la lescha da polizia che vegn a generar cuosts supplementars.

Cussegl:

Conto 2120.3020.00; Ei ha dau entginas midadas tier la scola sco era tier la scoletta. Ulteruramein ei il pensum dil meinascola vegnius alzaus da 50% sin 60%. Per tgei raschun han ins augmentau quei pensum?

President communal Robert Cajacob:

La proposta d'alzar il pensum da lavur dil meinascola ei vegnida dil cussegl da scola, muort la cumplexitad dalla materia en la sparta dil scolaesser.

Cussegl:

Conto 2192.4260.00; Daco ei la restituziun davart la pleiv ida marcantamein anavos?

President communal Robert Cajacob:

Cun l'introducziun dil plan21 eis ei vegniu strihau ina da duas lecziuns dall'instrucziun da religiun. Niev vegn instruiu il rom etica.

Cussegl:

Fegl annex CSC; "Escape-Room" expensas da 19'000.-- francs. Co ei la nova purschida vegnida frequentada?

Gerau Clemens Berther:

Il menader dil CSC ei fetg innovativs ed activs. La nova purschida ha carmalau 60 gruppas. Il giavisch ei da transferir provisoriamein igl "Escape-Room" sut la halla per saver porscher l'attracziun era igl unviern. La tegia da lenn ei ussa vegnida baghegiada entuorn en la hetta da fondue.

Per informaziun: proximamein vegn la piazza dil pedel publicada.

Cussegl:

Co san ins declarar la sminuaziun dil glatsch digl onn 2019 sin 2020?

Gerau Clemens Berther:

Ils davos onns ha il "Know-how" muncau. Il proxim onn retscheiva il CSC il sustegn co nezegiar endretg l'energia.

Cussegl:

Per tgei motiv ei il recav dil CSC sminuius per rodond 500'000.-- francs? 2019 muntava il recav aunc 1,3 milliuns francs e pigl onn 2020 mo pli aunc 863'000.-- francs?

Gerau Clemens Berther:

La raschun ei sulettamein il sistem da cudischar (dameins scuntraziuns internas).

Cussegl:

El messadi vegn menziunau che la suprastanza communal ei lundervi da reveder il regulativ da taxas pils rufids. Ei vegn rendiu attent da buc augmentar la taxa fundamentala en general, mobein d'engrevegiar punctualmein il caschunader dil rumien p.ex cuosts gia naven da 0m³ tut sut il motto: "avon ch'ins ha pagau nuot, vegn la carga buca svidada". Ultra da quei eis ei urgent da procurar per meglieras cundiziuns da lavur pil personal dil menaschi tecnic (segirtad). La situaziun actuala tier la deponia a Raveras ei a liunga vesta buc acceptabla pli.

Gerau Victor Flepp:

Las discussiuns giudlunder occuoran. Igl ei vegniu instradau ina gruppa da lavur. Denton la sligiaziun ei oz buc aunc sin meisa. Segiramein vegn ei mirau da far il plaz da lavur a Raveras pli attractivs pils luvriers. Igl access sto vegnir ponderaus da rudien (entrada/extrada), igl incasso (carta digital eav.) sco era las controllas.

Cussegl:

Adina puspei vegnan discussiuns lantschadas pertuccont ina reducziun dil pei da taglia (actual 120%). Las retschercas han mussau che vischnauncas plitost pintgas han aunc in pei da taglia da 120% e 130% (p.ex Mathon, Donat, Furna, Lohn, Masein, Bravuogn). Disentis/Mustér sco vischnaunca centrala (subcenter) fuss in pei da taglia 105% realisticas.

Nossa vischnaunca sto uss vegnir pli attractiva per cheutras evitar la digren dalla populaziun. Il cash-flow giavischau portan las investiziuns futuras. Plinavon vegn appellau da restrenscher la buontad cun las vischnauncas vischinontas en connex cun dimorants dall'jamna (viver en nossa vischnaunca e profitar dil pei da taglia bass dils vischins!).

President communal Robert Cajacob:

Ord vesta dalla suprastanza communal ei in sbassament dil pei da taglia pil di dad oz buca prudents. Cun sbassar uss il pei da taglia periclitein nus ils projects pli gronds sco in CSC. En dus-treis onns sa quella discussiun vegnir menada.

Gerau Clemens Berther:

Sche la cumpart dalla taglia da schischom sa vegnir zacu alzada dad 1,7‰ sin 2,0‰ savessen ins metter en mira ina reduenziun dil pei da taglia da 120% sin 115%. Pil mument ei in augment dalla taglia da schischom sur 2,0‰ buca pussevvels el cantun Grischun. Sche quella pussevveladad vegn dada zacu, lu savessen ins engrevegjar ils possessurs d'immobillas.

Cussegl:

Co vesa la repartiziun da cuosts per la sanaziun dalla Via Run ora?

Gerau Wendelin Jacomet:

Ils possessurs da casas pagan ina cumpart tenor perimeter vid la Via Run.

Cussegl:

Conto 6190.5060.00; 65'000.-- francs expensas tier il menaschi tecnic, diever?

Gerau Clemens Berther:

Quella summa vegn impundida per remplazzar in auto dil menaschi tecnic.

Cussegl:

Controlla da credits, conto 6190.5040.00; Cunquei che la remisa vegn buca baghegiada tenor plan e credit concediu da 216'000.-- francs, duei quei credit vegnir aboliu e strihaus ord la controlla da credits. A temps vegn la suprastanza communal a seolver tier il cussegl cun in niev project e cun ina nova damonda da credit.

Gerau Clemens Berther:

Ils motivs che la remisa preveda ei buca vegnida baghegiada ein las prescripziuns dalla segirada da baghetgs (zona da prighel). Sche la proposta da strihar quella posiziun vegn dil cussegl, sa lez naturalmein decider giudlunder.

Proposta da cusseglia Rita Huonder-Tenner:

Propona da strihar il credit concediu da 216'000.-- francs per la remisa a Sogn Placi.

Il cussegl accepta la proposta unanimamein.

Cussegl:

Conto 6150.6370.03; Via Sogn Placi summa da credit da 163'040.-- francs (80%, perimeter) denton figurescha uss mo cun 62'448.-- francs, daco quella differenza?

Gerau Wendelin Jacomet:

Ins ha buca aunc tschentau tut ils quens da perimeter. La pendenza vegn liquidada igl onn 2020.

Cussegl:

Il credit dalla meglieraziun da 40 milliuns francs (10%) duess figurar ella controlla da credits. Plinavon vegn ei constatau, che la suprastanza communal ha surpassau sia cumpetenza tier la cumpra dalla maschina da gas per la serenera conto 7201.5042.00 (surpli da cumpetenza da 3'000.-- francs).

Cussegl:

Conto 3290.5090.00; Project d'embellaziun, signalisaziun ed informaziun el vitg. Dat ei ina successiun da quei project?

Gerau Wendelin Jacomet:

Sulettamein il project dalla staziun dalla Viafier retica vegn realisau resp. cuntinuu. La part si miez el vitg vegn buca realisada.

Proposta da cusseglier Adrian Deflorin:

Cusseglier Adrian Deflorin propona d'installar ina cumissiun cumpetenta per sclarir da rudien la pusseivladad da sbassar il pei da taglia sin las entradas da momentan 120% sin niev 105%.

Cunzun duei la cumissiun elaborar:

- las consequenzas dil sbassament da taglia sin la finanziaziun dallas investiziuns futuras da nosa vischnaunca e metter il resultat en cumparegliaziun cun la situaziun actuala cun il pei da taglia da 120%;
- sco in cash-flow da minimum 1,25 milliuns francs sa vegnir mantenius el futur cun in sbassament dil pei da taglia sin 105%;
- sco optimar las ulteriuras taglias e taxas.

Il resultats duein esser enconuschents avon ch'il plan da finanzas 2021-2025 vegn tractaus el cussegl da vischnaunca.

Decisiun:

La proposta da cusseglier Adrian Deflorin vegn approvada dil cussegl da vischnaunca unanimamein.

Decisiun:

En concordanza cun la cumissiun da gestiun propona la suprastonza communal al cussegl da vischnaunca da:

- 1. Approbar il preventiv 2020 cun suttametter quel al referendum facultativ conform agl art. 21, lit. a dalla constituziun communal;***
- 2. Fixar il pei da taglia sin las entradas e la facultad sin 120% dalla taglia cantunala ed il pei da taglia sin schischom ad 1,7‰ (sco tochen dacheu).***

Il cussegl approbescha las propostas dalla suprastonza unanimamein senza abstenziuns.

Cussegl da vischnaunca Disentis/Mustér
Il president: L'actuara dil di:

Armin Berther

Ursina Murer-Fatzer



Cussegl da vischnaunca 2017/2020
Protocol nr. 23
Seduta dils 14 da november 2019

Orientaziuns:

President communal Robert Cajacob informescha ils presents che Sedrun Mustér Turissem resp. las vischnauncas purtadras ein lundervi da midar l'uniun en ina societad acziunara (SA).

Ils 23 da november 2019 ha liug a Disentis/Mustér la fiera da Nadal.

La proxima seduta dil cussegl da vischnaunca ha liug ils 13 da december 2019.

Cussegl da vischnaunca Disentis/Mustér
Il president: L'actuara dil di:

Armin Berther

Ursina Murer-Fatzer

Disentis/Mustér, ils 14 da november 2019